

No. Soalan: 49  
PR-1353-L02958

**PEMBERITAHUAN PERTANYAAN BAGI JAWAB LISAN**  
**DEWAN RAKYAT MALAYSIA**

**PERTANYAAN** : **JAWAB LISAN**

**DARIPADA** : **DATO' KAMARUDIN BIN JAAFAR**  
**[ TUMPAT ]**

**TARIKH** : **14 NOVEMBER 2017**

**SOALAN** : **Dato' Kamarudin Bin Jaafar [ Tumpat ]**  
minta **MENTERI LUAR NEGERI**  
menyatakan sikap Kerajaan terhadap  
tindakan tentera Arab Saudi mengebom  
tanpa perikemanusiaan tempat-tempat  
awam di Yaman yang mengakibatkan  
pembunuhan ratusan ribu manusia yang  
tidak berdosa.

## JAWAPAN

Tuan Yang di-Pertua,

Saya mengucapkan terima kasih kepada Yang Berhormat Tumpat atas pertanyaan yang dikemukakan.

2. Untuk makluman Dewan yang mulia ini, Malaysia sesungguhnya sangat peka dan mengambil berat terhadap pergolakan di Yaman yang telah berlarutan hampir dua (2) tahun. Peperangan yang berlaku telah mengorbankan ribuan nyawa orang awam selain menyebabkan kesengsaraan berpanjangan ditanggung oleh rakyat Yaman.

3. Malaysia mengiktiraf Kerajaan Yaman di bawah kepimpinan Presiden Abdrabbuh Mansour Hadi dan menyokong usaha-usaha masyarakat antarabangsa untuk memastikan kesatuan serta kebebasan negara Arab tersebut.

4. Dalam hal ini, Malaysia menyokong penuh usaha-usaha yang dilakukan oleh Duta Khas PBB ke Yaman iaitu Ismail Cheikh Ahmad untuk membawa pihak-pihak yang bertelagah kembali ke meja rundingan. Adalah penting untuk mencapai kestabilan politik di Yaman supaya dapat menjamin kesejahteraan kehidupan rakyat negara tersebut.

Tuan Yang di-Pertua,

5. Sepertimana keprihatinan Malaysia terhadap situasi kemanusiaan di negara-negara seperti Palestin, Syria, Myanmar dan lain-lain lagi,

Malaysia juga amat menitikberatkan akan perkembangan situasi kemanusiaan di Yaman.

6. Sebagai contoh, Malaysia sebagai anggota Pertubuhan Kerjasama Islam (OIC) telah memanfaatkan platform tersebut untuk membantu ke arah usaha penyelesaian konflik di Yaman. Semasa Sesi Tergempar Majlis Menteri-Menteri Luar Negeri OIC berhubung isu Yaman di Jeddah pada 16 Jun 2015, Malaysia telah mengumumkan sumbangan kewangan sebanyak USD100,000 bagi tujuan bantuan kemanusiaan kepada rakyat Yaman melalui platform OIC. Sumbangan tersebut secara langsung membuktikan komitmen Kerajaan Malaysia untuk membantu rakyat Yaman dan jaringan kerja OIC yang luas akan menjamin keberkesanan penyampaian bantuan oleh Kerajaan Malaysia.

7. Sehubungan dengan itu, Malaysia menyokong usaha-usaha Arab Saudi mahupun mana-mana negara lain untuk mempertahankan kedaulatan dan keselamatan negaranya.

Sekian, terima kasih.